

Siunnersuut uunga: Suliniutini angisuuni illuliortiternerni sanaartornernilu suliassat pillugit Inatsisartut inatsisaat nr. xx, xx.xxx 2012-imeersoq.

(Inuussutissarsiornermut Aatsitassaqaarnermullu Naalakkersuisuni ilaasortaq)

Akissutitut allakkiaq

(Inuussutissarsiornermut Aatsitassaqaarnermullu Naalakkersuisuni ilaasortaq)

Aappassaanneerera

Inuussutissarsiornermut Ataatsimiititaliami ilaasortat suliarujussuannik Naalakkersuisut qutsavigaat.

Siunnersuummut matumunnga tunngatillugu sapaatit akunnerini qaammatinilu kingullerni oqallinnerujussuup malinnaaviginissaa nuannersuusimavoq. Kalaallit Nunaanni innuttaasunik, politikernik soqutigisaqaqatigiittutullu kattuffinnik pimoorussisunik arlalinnik peqarnera oqallinnerup takutippaa. Oqallinnermi apeqqutit arlalippassuit pingaarutillillu saqqummiunneqarsimapput.

Maannakkulli suliffissanik nutaanik aningaasanillu isertitassanik pisariaqartitsinerput suliniutinut angisuunut inatsit pillugu Naalakkersuisut inatsisissatut siunnersuummik saqqummiussinerannut pingaarnarpaatut tunngaviuvoq!

Aningaasaqarneq iluamik ingerlanngilaq. Ukiuni takkuttussani piitsuunerulissaagut. Kinguppattassat 25 %-inik ikilisinneqassapput, ukiullu arlalissuit ingerlaneranni nutserartorpassuaqarpoq.

Maannakkut iliuuseqaanngikkutta ukiuni takkuttussani atugarissaarnerput eqqorneqassaaq. Ukiorilikkat tunngavigalugit utoqqalinersiutisiaqartarneq ilisimaneqartoq artukkersinneqarsinnaavoq. Peqqissutsikkut sullississutit tamaasa atuisunit akiliuteqaqqaarfiginagit atugarisinnaajuarnissaat qulariuaannarsinnaanngilarput, ilinniagaqarfittullu ilisimasarput, kikkunnut tamanut naligiissoq, annikillisinneqarsinnaavoq.

Tunisassiorfissanik suliniutinik nutaanik aallartitsinissaminut Nunatta Karsia aningaasaateqaanngilaq. Avataaniit inuussutissarsiutini aningaasaliissutit pisariaqartippavut. Tamannalu ilutigalugu aningaasartuutivut nunanut allanut amerlanernut naleqqiullugit qaffasinneruneri paasisariaqarparput. Taamaattumik tunisassiorfiusunut sinaakkutissanik pitsaasunik neqerooruteqartariaqarpugut – taamaaliunngikkutta nunani allani aningaasaliinissaq toqqassammassuk.

Suliniutunik uagut nammineq ingerlannissaannut angivallaartunik inatsit piviusunnngortitsinissamik periarfissiisaaq. Taamaattumik sanaartornerup nalaani sulisartut avataaneersut pisariaqartippavut.

Kalaallit Nunaanni suliniutunik angisuunik piviusunnngortitsinernut unammillersinnaassuseq pitsanngorsagaq pisariaqartinneqarpoq, aammalu sanaartornermi aningaasartuutit unammillersinnaanermik periarfissaqarfiusariaqarlutik. Tamanna ilutigalugu inatsisip akuersaarnartunik aningaasarsiaqarnikkut atorfininnermilu atugassarisanik isumannaarinissaa aalajangiisuulluinnarpoq.

Aningaasarsiatigut atorfininnermilu atugassarisat sulisitsisut aamma sulisartut akornanni isumaqatiginninniutigineqassapput.

Taamaattorli sanioqqunneqarsinnaanngitsumik inatsisissatut siunnersuummi annikinnerpaaffissamik aningaasarsiasat aalajangersaavigineqarput. Kalaallit Nunaannilu annikinnerpaaffissatut aningaasarsiat assersuutigalugit Frankrigimi, Belgiami, Irlandimi, Hollandimi, Tuluit Nunaanni aamma Spaniami annikinnerpaaffittut aningaasarsiarisat qaffasissuusut inissisimaffeqatigaat.

Inuussutissarsiornermut Ataatsimiititaliap kissaatigisaa naapertorlugu siunnersuummi § 10-mut, ataatsimoorussanik isumaqatigiissutinut aamma sulisartunut avataaneersunut annikinnerpaamik aningaasarsiarisanut tunngasumut Naalakkersuisut allannguutissatut siunnersuutitik arlalinnik saqqummiussaqaarsimapput. Allannguutissatut siunnersuutit siunertaat tassaapput atugassarititanik Naalakkersuisut akuersaarnartutut, kinaassusersiunngitsutut aammalu piviusorsiorlutut tunngavilersugaasutut isigisaannik erseqqissaanissaq, kiisalu sulisartuusunut iluaqutaanngitsumik nalinginnarmik sulinermi inatsisitigut pisinnaatitaaffiit sanioqqunneqartinnagit aalajangiinissaq. Taamaattumik Kalaallit Nunaanni sulisartut kattuffiisa akornanni ataatsimoorussatut isumaqatigiissutini aalajangersagaasuni nal. akunneranut tunngaviummik aningaasarsianut naleqqiullugu nal. akunneranut appasinnerusumik aningaasarsiasat aalajangersaavigineqarsinnaannginnerat siunnersuummi maannakkut erseqqissumik takuneqarsinnaalerpoq. Aningaasanit taakkunanit nerisat najugaqarnerillu nalingisa, atisarianut aningaasartuutit, akilikkanik angalanerit sillimmasiinerillu matussusiinissanut aningaasartuutit ilanngaatigineqarsinnaapput, tamannalu siunnersuummi oqaaseqaatini allassimavoq. Oqaaseqaatini piffissami matumani ilanngaatissap naapertuuttup sap. akunneranut 1.050 kr. sinnersimasariaqanngikkaa oqaaseqaatini naatsorsugarineqarpoq. Piumasaqaatit ersarinnerusut nalunaarummi aalajangersarneqassapput.

Tamakku saniatigut illuatungeriit pingasut akornanni isumaqatiginninniarnernut, aamma IBA-mik isumaqatigiissutitut ilisimaneqartunut tunngatillugu aalajangersakkat sukateriffigineqarput, taamaalilluni sapinngisamik suliassat amerlanerpaat Kalaallit Nunaanni sulisartunut suliffeqarfinnullu pisalernissaannut isumannaarinernut taakkunani siunertat suli erseqqinnerulersillugit takuneqarsinnaalerlutik, taamaalilluni Kalaallit Nunaanni inuussutissarsiorfiup piginnaasaqassusai ineriartortinneqassammata, aammalu suliniutit

tamakkiisutut Kalaallit Nunaanni inuiaqatigiinni tunngasunut naleqassutsit siuarsarnissaannut ilapittuuteqassammata.

Tamakku saniatigut kikkut tamarmik ilanngunneqarnissaannik, ilanngullugit pisortatiguunngitsutut kattuffeqarfiit aalajangiisarnermi ingerlattakkani tamanik isiginnissinnaaneq isumannaarniarlugu siunnersuummi aalajangersaavigineqarnissaata siunnersuummi erseqqinnerusumik takuneqarsinnaanissaa pillugu ataatsimiititaliap kissaatigisaanik naapitsiniarluni Naalakkersuisut allannguutissatut siunnersuut saqqummiuppaat.

Taamatut oqaaseqarlutik Naalakkersuisut allannguutissatut siunnersuut akuersissutigisassanngorlugu innersuutigaat, siunnersuullu pillugu oqallinnerup ingerlateqqinnissaa qilanaaralugu.